

La Lettre Jèrriaise - Marianne Sargent - Lé 5 dé Févri 2022

Bouônjour bouonnes gens. Ch'r'est mé, Marianne Sargent, tchi vos présente la Lettre Jèrriaise chutte sémaine et j'ai des bouonnes nouvelles.

J'ai té à l'êcole d'Pliat Doué dépis l'mais d'Septembre, où'est qu'j'enseîgne lé Jèrriais ès êfants dé l'année 2 jusqu'à l'année 6. Il' ont eune léçon par s'maine pour trente minutes. Il à té eune expéthience positife d'en par-'chîn et l's êfants ont té hardi excités d'apprendre la langue Jèrriaise. Jé m'sers des arîmmées par Joan Tapley auve les jannes, où'est qu' jé chantons entouor les couleurs et les neunméthos. Épis avec l's êfants pus s'âgis j'apprannons lé vocabulaithe avec les gammes. Ch'est beinfaîsant d'êt' dans ieune pliaiche, où'est qu' l's êfants ont l'enseîgne continnuel et j'peux vaie lus progrès. Touos les jours, quand j'sis à marchi dans les corridors j'sis saluée avec des faches souôriants et des cries dé 'bouônjour!'

Malheutheusement, lé Noué pâssé lé Covid èrtouônnet et chu tèrme 'chîn j'avons 'té partitchuliéthement affecté dans l's êcoles, et dans des temps j'avons ieu rein qué siêx ou sept êtudgiants châques jours. J'réalisiînmes not' plians pour un Eisteddfod tout drait 'tait împôssibl'ye, avec la rentrée ès vîsagiéthes et la travâl'lie siez nous au mais d'Janvyi, et les règliéments dans l's êcoles.

En fîn, j'décidînmès dé faithe la section ès mousses en lîngne avec l'ordinateur acouo ch't' année. Toute comme à la pliaiche d'la r'cordéthie ès présentâtions comme l'année pâssée, j'allînmès vivant. L'êtchipe d'enseîngni allîtent ès êcoles, où'est qu' l's êtudgiants présentîtent d'vant un camera à not' adjudicateur Moussieu Winston Lé Brun et s'n adjoint Moussieu Ken Vibèrt, tchi 'taintent dans la chambre à conmitté à la Salle Pârrouaîssiale dé St Ouën. Duthant lé deux jours pus d'chent souaixante êfants et jannes gens prîtent part dè onze êcoles prînmaithes et s'gondaithe. Ch'tait magnifique! Moussieu Michael Blackie, lé gérant d'l'Eisteddfod dé Jèrri vînts nos r'vaie lé Vendrédi arlévée et i' dit qu'il avait joui d'l'événement en lîngne un tas. Mais i' dit qu'il lé prîncipa tchi manque 'tait les mèvelles à Maureen!

Don, j'ai des bouônes nouvelles entouor la section ès adultes, tchi s'en va s'pâsser chute année après tout. Achteu qu'i' n'y'a pon tant d'malades, j'attendons fête à un audience à la Salle Pârrouaisiale dé St Ouën, Sanm'di lé 26 d'Mar. Sauvez la date s'i' vos pliaît! J'espéthons à pèrsuader un tas d'gens sus la strade, don, si ous êtes intéressis et ou voudrêtes prendre part, téléphonez au secrétaihe Moussieu Colin Ireson sus 726871. L'évenement prendra pliaiche duthant la rêunion d'l'Assemblée du mais d'Mar. Si ous voudrez v'nîn et r'garder les présentâtions, téléphônez la fanmil'ye Lé Brun sus 739341 pour ajoutêter vos noms s'i' vouos pliaît.

J'voudrais vos ramemouaithé qué l'été pâssé, j'êcrivis entouor Pierre, l'anmîn dé man fis, qui 'tait à aver du traitement pour lé cancèr. J'ai des mangnifiques nouvelles! Lé radiotherapy 'tait un succès et i' gangni remission. Don, il allit en Améthique la s'maine pâssée pour c'menchi eune êpreuve clinique d'entrét'nîn. J'avons les crouaïsis pour lé succès du traitement.

À la préchaine fais. Prenez soin dé vous même. À bi pour achteu.